

inam tu sinsi

Mazima saikin kusian gaku, aupa supah sinsi masnava zami mas masial tu iniliskinan, tailas, siin mamantuk tu qansiap.

Maszang inaan tu sisipul tu masnava, isicia a ngan hai tupaun tu Tahai.Palavian, masnava zami makua masipul “tasa, dusa, mas-an, mapus-an”, “ tacini, dadusa, tatau.” “tasa susan ima min num,” “ ima suidaing, siva suidaing, masanmasan.” pinhansiapun kaimin tu makua masipul, makua masipul sui, pinhansiap ma-uvaiv sui. tahuan kaimin tu “namin madia mais palaslunun.” mapasnava hai, maszang amin tu asa tu daudaukun mahatul hansiap, napinsupah mas taiklas.

Masnava huzas tu sinsi hai, isaicia ngan hai tupaun tu Abus. Palavian. isnavan kaimin mas itu bunun tu huzas, tahuan kami bunun-tuza tu makitvaivi tu isling hai, sia mas pasibutbut tu huzas, pasibutbut tu huzas mais tusausun hai, maszang minvau a sing-av ta-a-zaun, isia maupa cia tu sing-av hai, tupa a sinsi tu, “kaaz Bunun hansiap tusau mas maupa tan tu huzas.”

Maza malastauluu tu sinsi, i saicia ngan hai, tupaun tu Ilung Tanapima, tahuan kaimin tu, “ tastu qanian tu ailsanusan hai isian um-um” aphasisa, maisnasian sinsi tu halingaz hai, pinhansipun kaimin tu asa niitu mapinmamaz mas hanian, asa tu mananulu mihumis, katu min-uni malaitaz tu isnavaan, asa tu min-uni makaskas tu isnavaan, aupa malaitaz tu

isnavan hai, nakahaitasun duma tu bunun, naniitu mahtu usizaan itu sinsi tu taiklas, nasauhabashabas malmimihdi minghumis. maza makaskas tu isnavan hai, na mahtu usizaan itu sinsi tu taiklas, na mahtu sau habashabas malinaskal minghumis.

Maza malas Bunun tu sinsi hai, isaicia ngan tupaun tu Hundiv Takisvilainan, madia isaicia a hansaipun mas masial ta-azaun tu sinpalihabasan, maszang pali-uni tu makua a dalahan min-aiza, maisna-isa a kata bunun nastu cin minsuma. tatahu ami habasan minpakaliva tu ininghumisan. maszang “ vali min-uni buan ”, istupa mita tu, “ panahunin vali hai min-uni laupaku mas buan. nanu dau naminbaas hai, aupa ta-aza tu mavia bunun tu manah hai, laduaz sin matukalakin. buan hai masnava mas bunun tu liskasia buan munhuma sin lus-an.” saitan a itu bunun istutupa tu “liska buan” tu aisidaan. pinhansiapun saikin tu, Bunun tu sinkuzakuza hai liska sia buan mapasnava. cis-uni maupa cia hai, unhansiapan saikin mais itu Bunun tu sininghumis.

Mazima saikin isnavan naicia, aupa dangian amin nai-a mas madaidaz bunun tu is-aang. Musasu, mahansiap amin masnava, cis-uni maupacia at, maka-mahansiapin saikin tusaus, masipul, malasBunun, malasTauluu. tuzatuza uningang mas sinsi.